



Uunga Aqqaluaq B. Egede, Inuit Ataqtigiit

## Tusarniaanerop ingerlasarnerinut tunngatillugu apeqqutinut akissuteqaat

Inatsisartut Suleriaasianni § 37 malillugu apeqquteqartoq tusarniaanerit ingerlasarnerannut tunngasunik arlalinnik apeqquteqarpoq.

Aallarniutigalugu apeqquteqartoq tusarniaanerit ingerlanerisa sapinngisamik pitsaanerpaajusarnissaannik angusaqarnissamut soqtiginninneranut qutsavigerusuppara. Suliniutit angisoorsuit innuttaasut ulluinnarni atugarisaannik allanguuteqartitsisut aallartikkaagatsigu, tamanna Naalakkersuisut politikkianni tunngaviulluinnartumik pingaartinneqarpoq.

Apeqquteqartumut ilisimatitsissutitut oqaatigisinnaavara apeqqutivit akissuteqarfigineqarnerinut atatillugu Aalisarnermut, Piniarnermut Nunalerinermullu Naalakkersuisoqarfimmi (apeqqut 3) aamma Peqqissutsimut Naalakkersuisoqarfimmi (apeqqut 4) suleqatinnit paasissutissanik pissarsiniarsimagama.

### Apeqqut 1:

1. *Nunatsinni inuit ukioqatigiiaat immikkoortukkaat amerlassutsimik-  
kut allanguuteqalernerat annertuvoq, suliassanik annertuunik malitseqartussa-  
mik. Tusarniaaneq pitsaanerusoq pisariaqartussaavoq – tamatumani susoqarpa?*

Suliniutinut annertuunut assigiinngitsorpassuarnut Naalakkersuisut ingerlataan-  
nut/ imaluunniit pilersaarutigisaannut atatillugu tusarniaanerni periaatsit pitsaane-  
rusut apeqquteqarnerni ujarporpatit. Taamatut isiginninnermi Naalakkersuisut  
apeqquteqartoq isumaqatigaat. Apeqqummi matuma kingulianiittumi suliniutit  
tusarniaanerit pitsaanerusemik ingerlasarnissaannut tunngassuteqartut erseq-  
qissarneqarput.

### Apeqqut 2:

2. *Aatsitassarsiornikkut ineriartortitsineq annertuvoq, paasissutissa-  
nik amerlasuunik nalunaarusianillu annertusinnaasunik malitseqartussaasut.  
Piffissaqarluartumik tusarniaaneq, akissutigineqartullu tamakkiinerusut pingaar-  
teqartussaapput – tamatumani Naalakkersuisut qanoq periuseqarpat?*

Aatsitassarsiornermut suliassaqaarfik ukiuni makkunani annertuumik ineriartorpoq  
aammalu suliassat arlallit suliarineqarput. Suliassat pissusissamisoortumik assi-  
giinngitsorpassuusinnaapput taamaattumillu innuttaasut naammattumik peqataa-  
tinneqarnissaat qulakkeerniarlugu assigiinngitsumik suliniuteqarfiginissaat pisa-

Ulloq: 9. september  
2011

Postboks 1601  
3900 Nuuk  
Oq/tel +299 34 50 00  
Fax +299 32 56 00  
isiin@gh.gl  
www.nanoq.gl

riaqarsinnaalluni. Aatsitassarsiornermik suliassat ataasiakkaat inerisarneqarne-  
rannut atatillugu aatsitassanut ikummatissanullu inatsit malillugu Inuiaqatigiinni  
pijuartussamik iluaqutaasumik sunniutaasussanik nalilersuineq (VSB) suliarine-  
qartussaavoq. Inuiaqatigiinni pijuartussamik iluaqutaasumik sunniutaasussanik  
nalilersuinerpiaq oqartussaasut, innuttaasut soqutigisaqartullu kalluarneqartus-  
sat, ilanngullugit NGO-it attuumassuteqartut, peqataatillugit pisarpoq. VSB-mi  
suliap ingerlanerani kikkut tamarmik peqataatinneqarnerat assersuutigalugu  
soqutigisaqartut kalluarneqartussat oqaloqatiginerisigut, innuttaasunik ataatsimii-  
titsinertigut, paasititsiniaanertigut aammalu TV-kkut aallakaatitsinertigut pisarpoq.  
VSB-mut nassuiaat tamatuma kingorna nittartakkami [www.nanoq.gl](http://www.nanoq.gl) tusarniaa-  
nermut tunngasortaani tamanut saqqummiunneqartussaavoq. Tamanut amma-  
sumik tusarniaanerpig ingerlanerani soqutigisaqartunit amerlanerusunit siusinne-  
rusukkut suliassanut aalajangersimasumut inuiaqatigiinni pijuartussamik ilua-  
qutaasumik sunniutaasussanik nalilersuinerup ingerlanerpiaani toqqaannartumik  
peqataasimanngitsunit tusarniaanermut akissuteqaatinik pissarsiniarnissaq  
aamma periarfissiisarpoq. Tusarniaanermut akissuteqaatit tiguneqartut misissor-  
neqareerneranni VSB-mut nassuiaat inaarutaasoq suliarineqartarpoq. VSB-mut  
nassuiaat tamatuma kingorna IBA-mut isumaqatigiissusiassanut (kommunip(-it),  
pisinnaatitsissummik pigisaqartup aamma Naalakkersuisut akornanni suleqatigiit  
pingasut isumaqatigiissutaat) taamatutaaq tamanut ammasumik saqqummiun-  
neqartussanut tunngaviliisuusarpoq.

Taamatutaaq aatsitassarsiorluni uuliasiorlunilu misissuinermi suliassani pisin-  
naatitsissummik pigisaqartuq ingerlatassatut siunnersuutigineqartunut anner-  
tuumik Avatangiisinut sunniutaasussanik nalilersuinermik (VVM) suliaqassasoq  
inatsisitigut piumasaqaataavoq. Ingerlatanut aatsitassarsiornermut uuliasiorner-  
mullu tunngassuteqartunut avatangiisitigut sunniutaasussat tamanit nunami  
namminermi aammalu nunani tamalaani annertuumik eqqumaffigineqarput.  
Taamaattumik Naalakkersuisut isumaqarput kikkut tamarmik VVM-mut nassuiaa-  
tinik atuarsinnaanissanut periarfissaqarnissaat aammalu tusarniarneqarnissaa-  
mut periarfissaqarnissaat pingaaruteqartorujussuusoq. VVM-mut nassuiaatit  
VSB-mut nassuiaatit assigalugit tusarniaanermut nittartakkamut [www.nanoq.gl](http://www.nanoq.gl)  
inissinneqartarput

Kisiannili VVM-mut nassuiaatit tekniskiusarput najoqqutassallu amerlanertigut  
annertuujusarlutik. Taamaattumik Naalakkersuisut sinerissap avataani misissuil-  
luni qillerinissanut VSB-mut aamma VVM-mut nassuiaatit tusarniaassutigineqar-  
nerannut atatillugu tusarniaanermut piffissaliussap sivitsorneqarnissaanik kissaa-  
taasunut tusaaniarsimapput, aalajangersimallutillu siunissami tusarniaanermut  
piffissaliussaq sapaatit akunnerinit 6-iniit sapaatit akunnerinit 8-inut sivitsorne-  
qassasoq. Sajuppillatsitsisarluni misissuinissamik qinnuteqarnermut atatillugu  
VVM-mut nassuiaatit tusarniaassutigineqartarnerannut tunngatillugu peqatigi-  
saanik aalajangerneqarpoq tusarniaanermut piffissaliussaq sapaatit akunnerinit  
4-iniit 6-inut sivitsorneqassasoq. Sajuppillatsitsisarluni misissuinissanut VVM-mut  
nassuiaatit tusarniaanermut nittartakkamut inissinneqartarnissaat suliniutaavoq  
nutaajusoq.

Innuttaasut soqutigisaqartullu kalluarneqartussat paasissutissilluarneqartarnissaasa aammalu inuiaqatigiinni piujuartussamik iluaqutaasumik sunniutaasussanik nalilersuinermi tamarmiusumi ilanngunneqarsinnaasunik ilanngussaqaarsinnaanissamut oqaaseqaateqarsinnaanissamullu periarfissaqarnissaasa pingaaruteqarnerat Naalakkersuisut ilisimaaraat. VSB-mik suliat ingerlasarnerannit misilitakkat suli annikitsuinnaapput, kisiannili inuiaqatigiinni piujuartussamik iluaqutaasumik sunniutaasussanik nalilersuisarnerit taakkunungalu atasumik tusarniaanernik suliat ingerlasarnerisa amerliartorneranni, taakkua ingerlanerannit misilitakkat katersorneqassapput aammalu VSB-mik suliaqartarnernut malittarisassat 2009-imeersut nalilersoqqinneqarnissaannut tunngaviliissallutik. Tusarniaanernik suliat ingerlasarnerisa pitsanngorsarneqarnissaannut suliaqarneq aallartinneqareerpoq. Tamatuma saniatigut tusarniaanernik suliat ingerlanerisa pitsanngorsarneqarnissaat ingerlaavartumik suliniutigineqarpoq, soorlu tamanna assersuutugalugu tusarniaanermut piffissaliussat sivitsorneqarneranni pisimasoq.

### Apeqqut 3:

3. *Aalisarnermik inuussutissarsiorneq inuussutissarsiutitut naleqqusaavigineqarniarpoq. Nunatsinni inuiaqatigiinnut malinnaatitsinikkut ingerlanneqartariaqarmat, tusarniaasarnikkut nutarterinissaq pingaaruteqarpoq, isummerfissat paasissutissallu annertummata – tusarniaaneq qanoq ingerlanneqarpa?*

Aalisarnermik inuussutissarsiuteqarnerup aaqjissuuteqqinnissaanik Naalakkersuisut pilersaaruteqarneranni siunertaasoq tassaavoq, aningaasaqarnikkut uumassusilinnillu nungusaataanngitsumik Kalaallit Nunaanni aalisarnermut sinaak-kusiinissap kissaatigineqarnera.

Ilisimaneqartutut innuttaasut arlalippassuit inuussutissarsiorneq taanna inuuniarnerminni isertitaqartaqarfigisarpaat – aammalu nunami maani inuit aalisarnerup saniatigut allanik isertitaqarfiussanik periarfissaqannginneranni assersuutis-sarpassuaqarpoq.

Taamaalilluni aalisarnermik inuussutissarsiuteqarnerup iluarsaateqqinneqarnerani apeqqutit inuiaqatigiit aningaasaqarnerannut tunngasut annertoorsuit isummerfigineqarnissaat pisariaqartussaavoq. Aammalu tassunga atatillugu apeqqu-teqartoq ilumoorpoq, innuttaasut sapinngisamik sukumiisumik paasissutissinneqarnissaat, peqatigisaanillu innuttaasut tusarniaanerit sunniuteqarluartumik ingerlanneqarnerisigut innuttaasut iluarsaaqqinnermut suliap ingerlanerani peqataanissamik periarfissaqartinneqarnissaat pingaaruteqartoq.

Tusarniaanermut suliap ingerlanerata/periaatsip sunniuteqarluarnissaa siuarsar-niarlugu Naalakkersuisut periusissamik suliaqarput, tassani kattuffiit attuumassu-teqartut kiisalu innuttaasut nalinginnaasut Namminersorlutik Oqartussani pilersaarusiormut suliat ingerlaneranni pitsaanerpaamik peqataatinneqarnissaat siunertarineqarluni. Tamanna piviusunngortinneqassaaq inatsisiliornissamut piareersarnermik suliaqarnermi kattuffiit aallaqqaataanilli peqataatinneqarnerisigut.

Suliaqarnermi Naalakkersuisut taamaalillutik aalisarnermik inuussutissarsiu-  
qarnerup iluarsaateqqinneqarnissaanut Naalakkersuisut pilersaarusionerannut  
tunngatillugu GA aamma KNAPK qanimut suleqatigaat. Aalisarnermut, Piniar-  
nermut Nunalerinermullu Naalakkersuisoq tamatuma saniatigut GA aamma  
KNAPK peqatigalugit arlalippassuarnik innuttaasunik ataatsimiititsinernik inger-  
latsisimavoq, tassani aalisarnermik inuussutissarsiornermi allannguutissanut  
pisariaqartinneqartunut tunngatillugu siunnersuutit pitsaasut katersorneqarlutik,  
aammalu tassunga atatillugu oqaatigineqarsinnaavoq Aalisarnermut, Piniarner-  
mut Nunalerinermullu Naalakkersuisoq siunissami innuttaasunik ataatsimiititsi-  
nernik taamaattunik amerlanerusunik ingerlatsinissamik pilersaaruteqartoq.

Apeqquut 4:

*"4. Peqqinnissaqarfiup aaqqissusaanerata allannguuteqarnissaa  
siunissami qaninnerusumi pissasoq anguniagaavoq, allannguinerit annertuut  
ila-tigut takorloorneqarlutik. Tusarniaanerit qanoq ingerlanneqarpat?"*

Naalakkersuisut, peqqinnissaqarfiup aqunneqarnera, aaqqissuussaanaera kiisalu  
peqqinnissamut tunngasutigut sullissisut aamma tarnip pissusaanik ilisimasallit  
pillugit Inatsisartut inatsisaat nr. 27, 18. november 2010-meersoq naapertorlugu  
peqqinnissaqarfiup aaqqissugaanera aaqqissuussaanageralu aalajangersartussaa-  
vaat. Inatsit suleqataasunut tusarniaaffigineqartussanut attuumassuteqartunut  
tamanut tusarniaassutigineqareersimavoq.

Peqqinnissaqarfimmik iluarsaaqqinneq 2011-imi januaarip aallaqqaataani atuuti-  
lersoq, peqqinnissaqarfimmi aaqqissuussinermi allannguuteqartitsivoq naleqqu-  
saanermillu malitseqarluni, taamaalilluni taanna maannakkut unammilligassanut  
naleqqussarneqarluni. Unammilligassani taakkunani ilaapput nunassittarnerup  
inuuniarnermilu atugassarititaasut allannguuteqarsimanagerat, teknologiiip nutaap  
ineriartornera kiisalu sulisuni isumalluutaasussani aammalu katsorsaanermi pe-  
riaatsini il.il. allannguutit. Aaqqissuussineq nutaaq isumalluutissat pioreersut  
pitsaanerpaamik atorluarneqarnissaannik annertunerujussuarmik aallussiffiusoq.

Peqqinnissaqarfimmi aaqqissuusseqqinnissaq sioqqullugu nassuiaat Inatsisartu-  
nut saqqummiunneqarpoq. Aammattaaq aaqqissuusseqqinneq pisortat ataatsi-  
meersuarnerini arlalinni Peqqinnissaqarfimmit tassanilu ingerlanneqartuni oqalli-  
sigineqartarsimavoq. Napparsimavinni aammalu Dronning Ingridip Napparsima-  
vissuani sulisut ataatsimeeqatigineqartarsimapput, aammalu – iluarsaaqqinnis-  
saq sioqqullugu taamatullu iluarsaaqqinnerup atuutileranagerat atatillugu – innut-  
taasunik ataatsimiititsinerit Peqqissutsimut Naalakkersuisumit Agathe Fontainimit  
peqataaffigineqartumik, illoqarfinni nunaqarfinnilu ingerlanneqarsimapput. Innut-  
taasunik ataatsimiititsinerni siunertaasoq ilaatigut tassaavoq innuttaasut Peqqin-  
nissaqarfimmi iluarsaaqqinnerup imminnut qanoq sunniuteqarnissaanik paasin-  
nitsinnissaat peqatigisaanillu ataatsimiinnerni najukkani innuttaasut peqqinnis-  
saqarfimmi sullississutit ineriartornerlu pillugit eqqarsaatiminnik isummersuutimin-  
nillu saqqummiussisinaanissamut periarfissiisimapput.

Peqqinnissaqarfiup aqunneqarnera, aaqqissuussaana kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaat nr. 27, 18. november 2010-meersumut maannakkut atuuttumut Inatsisissatut siunnersuutip ilusilersorneqarneranut atatillugu tusarniaaffiusut allattorsimaffiat imaappoq:

### **Namminersorlutik Oqartussat**

Naalakkersuisut Siulittaasuata Naalakkersuisoqarfia  
Ineqarnermut, Attaveqarnermut Angallannernullu Naalakkersuisoqarfik taassumalu ataani sullissiviit  
Aningaasaqarnermut Naalakkersuisoqarfik taassumalu ataani sullissiviit  
Aalisarnermut, Piniarnermut Nunalerinermullu Naalakkersuisoqarfik taassumalu ataani sullissiviit  
Inuussutissarsiornermut Suliffeqarnermullu Naalakkersuisoqarfik taassumalu ataani sullissiviit  
Isumaginninnermut Naalakkersuisoqarfik taassumalu ataani sullissiviit  
Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik taassumalu ataani sullissiviit  
Nunamut Namminermet, Pinngortitamut Avatangiisinullu Naalakkersuisoqarfik taassumalu ataani sullissiviit  
Aatsitassanut Ikummatissanullu Pisortaqarfik  
Kalaallit Nunaanni sulinermet nakkutilliisoqarfik

### **Peqqissutsimut Naalakkersuisoqarfimmi sullissiviit**

Nunatsinni Nakorsaaneqarfik  
Paarisa  
Peqqissutsimut Pitsaaliuinernullu Aqutsisoqarfik  
Imigassaq ikiaroorartullu pillugit siunnersuisoqatigiit  
Kalaallit peqqissartut angerlarsimaffiat  
Napparsimaviit peqqissaaviillu tamarmik  
Nuummi nakorsiartarfik

### **Naalagaaffimmi sullissiviit**

Peqqissutsimut ministeriaqarfik  
Peqqissutsimut aqutsisoqarfik  
Sulinermet nakkutilliisoqarfik  
Kalaallit Nunaanni Rigsombudsmandi  
Kalaallit Nunaanni Politimesteri  
Pituffimmi borgerráði

### **Kommunit**

KANUKOKA

KANUNUPE

Qaasuitsup Kommunia tassuma ataani sullissiviit ilanngullugit  
Qeqqata Kommunia tassuma ataani sullissiviit ilanngullugit  
Kommuneqarfik Sermersooq tassuma ataani sullissiviit ilanngullugit  
Kommune Kujalleq tassuma ataani sullissiviit ilanngullugit

## **Soqutigisaqaqatigiiffiit**

SIK

PPK (Peqqissaasut Kattuffiat) / PK (Peqqissaasut)

IMAK (Ilinniartitsisut kattuffiat)

PIP (Perorsaaneramik ilinniagaqartut peqatigiiffiat)

AK (Atorfiliit kattuffiat)

ASG (AC-it kattuffiat)

Kalaallit Nunaanni nakorsat peqatigiiffiat

Kalaallit Nunaanni kingutilerisut peqatigiiffiat

Danskít Psykologit peqatigiiffianni Kalaallit Nunaanniit ilaasortat

Peqqissaanermit ilinniarfik

### Apeqquut 5.

5. *Inuussutissarsiorfissatut nutaatut olie-siorfiit pilersaarutigineqartut sungiusimanngisavut ineriartortissallugit piviusorsiornersut misilittaavigineqarput - annertuumik oqallisigineqalereersut isummersorfiungaatsiartussaasut. il.il. – kalluarneqartussarpasuit tamatumani qanoq tusarniaavigineqarpat?*

Aatsitassarsiornermut suliassaqaqarfiup ineriartorneranut atatillugu paasissutissineqarnissamik innuttaasut pisariaqartitsinerat sapinngisaq tamaat naammassineqassaaq aammalu innuttaasut peqataatinneqarnissaannut periarfissaqarluasalluni, taamaalilluni aalajangiinerit tunngaviusut innuttaasut ilisimariigaat tunngavigalugit pisassallutik.

Naalakkersuisunit kissaatigineqarpoq uuliasiorluni misissuinermit immaqalu aamma uuliamik qalluinissamut atatillugu aalajangiinerit, innuttaasut tamarmik, soqutigisaqartut aammalu Kalaallit Nunaanni NGO-it, ilanngullugit IPO-it (nunap inoqqaavisa kattuffii) ammalu oqartussaasut oqaaseqaateqarnissamut periarfissaqartinneqarsimallutik, ammasumik ersarissumillu suliat ingerlanneqarsimaneerat tunngavigalugu pisassasut.

Uuliasiorluni misissuisarneq ukiut marluk kingullit Cairn Energy-p ingerlataasa ingerlanneqarneranni annertusisimavoq. Tassunga atatillugu misissuinerit assigiinngitsut ingerlanneqarsimapput aammalu soqutigisaqartunut attuumassuteqartunut oqaloqateqarnerit ingerlasimapput innuttaasunillu ataatsimiititsinerit ingerlanneqarsimallutik. Tamatuma saniatigut TV-kkut tusagassiutinilu allakkiornerni paasititsiniaanerit ingerlanneqarsimapput. uuliasiorluni ingerlatat taakkualu annertussusaat paasissutissiissutiginiarlugit TV-kkut aallakaatitassat suli tallimat pilersaarutigineqarput. Aammalu oqaatigineqassaaq ullumikkut uuliamik qalluinermit suliassat pineqanngimmata aammalu taamaattunik takkuttoqassanersoq tamannalu qaqugu imaluunniit sumi pissanersoq suli ilisimaneqanngimmat.

Aammattaq uuliasiorluni misissuinerit iluanni ingerlatat nalorninartortaqaartuaanarput, pissutigalugu ilisimaneqarneq ajormat ingerlatassaq pisussaq pineqarnerisooq/ukiup tulliani ingerlaqqissanersoq. Uuliamik niuerutigineqarsinnaasumik

nassaartoqassagaluarpalluunniit, uuliamik tunisassiornerup ingerlasinnaalernis-  
saanut ukiorpassuit ingerlaqqaartussaapput.

Suliassani uuliasiornermut tunngassutilinni avatangiisinut tunngassutillit nunami  
namminerminnaq soqutigineqartuunngillat, kisiannili aamma nunani tamalaani  
soqutigineqartuullutik. Taamaattumik Naalakkersuisut kissaatigaat kalaallit innut-  
taasut taakkunanilu oqartussaasut, kattuffiit peqatigiiffiillu paasissutissanik su-  
kumiisunik pissarsisinnaassasut aammalu isumanerluutiminnik oqariartuuteqar-  
nissamut, akerlillissuteqarnissamut, apeqquteqaateqarnissamut il.il. periarfissa-  
qassallutik.

Najoqqutassat tamarmik kalaallisut tuluttullu tusarniaanermut nittartakkami Na-  
noq.gl-imi tamakkiisunngorlugit tamanut saqqummiunneqartarput, taamatullu  
eqikkaaneq kalaallisut, danskisut tuluttullu tamanut saqqummiunneqartarluni.  
Peqatigisaanik 2011-imi aalajangiisoqarpoq tusarniaanermut akissuteqaatit kiisa-  
lu tusarniaanermut akissuteqaatinut oqaaseqaatit tamarmik Nanoq.gl-imut ikkun-  
neqartassasut. VVM-mut aamma VSB-mut nassuiaatit inaarutaasut taamatuttaaq  
tamanut saqqummiunneqartarput. Kingullermik uuliakoornissamut upalungaar-  
simanermut pilersaarut tamakiisoq annikitsut ilaatinnagit tamanut saqqummiun-  
neqarpoq.

Siunissami uuliamik tunisassiorortoqalissagaluarpat inuiaqatigiinni sunniutaasussat  
paasinarsisinniarlugit pilersaarutigineqarpoq Inuiaqatigiinni piujuartussamik ilua-  
qutaasumik sunniutaasussanik nalilersuineq ataatsimut isigalugu suliarineqar-  
tassasoq. Suliaqarneq UKA 2012-imi Inatsisartunut nassuiaasiornermik kingune-  
qassasoq pilersaarutigineqarpoq.

Niuerutigineqarsinnaasumik nassaartoqassagaluarpat taassuminngalu qalluinis-  
samik qinnuteqartoqarluni, VVM-mut aamma VSB-mut nassuiaatinik suliaqarneq  
suliap ingerlanera annertunerungaatsiartussaq aallartinneqassaaq, tassani innut-  
taasut peqataatinnissaannik piumasaqaatit suli annertunerusussaallutik.

Naalakkersuisut isumaqarput uuliasiorluni misissuinermi ingerlatanut atatillugu  
innuttaasut paasissutissanik pissarsinissamut tusarniarneqarnissamullu periar-  
fissaannik arlalippassuarnik pitsanngorsaasoqareersimasoq imaluunniit piler-  
saaruteqartoqarluni. Taamaakkaluartoq Naalakkersuisut soorunami innuttaasut  
paasissutissanik peqataatinneqarnissamillu pisariaqartitsinerat naammassiniar-  
lugu tusarniaanermik suliap ingerlasarnerisa naleqqussartarnissaat suli ingerlaa-  
vartumik aallutissavaat.

Neriuppunga apeqqutitit naammaginartumik akissuteqarfigineqarsimassasut.

Inussiarnersumik inuulluaqqusillunga



Ove Karl Berthelsen

Inuussutissarsiornermut Aatsitassanullu Naalakkersuisoq